

სსრ კავშირის ჩემპიონატი

დამთავრდა უმაღლესი ლიგის ფეხბურთელთა საკავშირო ჩემპიონატის აუტსაიდერთა თავისებური „მინი-ტურნირი“. მოგება ყოველ გუნდს აწინაურებდა სწორედ უშუალო კონკურენტთან შეხვედრაში და ამიტომაც გამარჯვებისთვის საჭირო იყო თავგამოდებული, უშეღავათო ბრძოლა.

„მინი-ტურნირი“ ყველაზე უკეთ აღმა-ათის „ქაირათმა“ განვლო, რომელმაც თავის ორ უშუალო კონკურენტთან ბრძოლაში მაქსიმუმი მოიპოვა - 4 ქულა. 3 ქულა გაინაღდეს ლენინგრადელმა ფეხბურთელებმა. ჩვენი გუნდებისთვის კი ეს უაღრესად საპასუხისმგებლო ტურნე ფრიად სავალალო შედეგით დამთავრდა: თბილისის „დინამომ“ ორ მატჩში მხოლოდ 1 ქულა აიღო, ლანჩხუთის „გურია“ კი, თუმცა ორივე თამაში მინიმალური ანგარიშით წააგო, თავის ისედაც მოკრძალებულ „აქტივს“ ვერაფერი შემატა.

უმაღლეს ლიგაში თბილისის „დინამოსა“ და ლანჩხუთის „გურიის“ წლევანდელი შედეგები კატასტროფულ მდგომარეობას უქმნის ორივე კოლექტივს. თუ ეს ვითარება ახლავე, უახლოეს ხანებშივე არ გამოსწორდა, „გურია“ კვლავ დაუბრუნდება I ლიგას, ხოლო თბილისის „დინამო“ პირველად თვისი არსებობის ისტორიაში დადგება დაბლა ჩამოქვეითების ფრიად სავალალო აუცილებლობის წინაშე.

არა გვგონია „დინამოსა“ და „გურიის“ ფეხბურთელებს, მათს ხელმძღვანელებს არ ჰქონდეთ შეგნებული, რომ თავიანთივე მიზეზით წარმოუდგენლად რთული პრობლემის წინაშე იმყოფებიან. მაგრამ ჯერ-ჯერობით რაღაც არ ჩანს, რომ ისინი საგანგებო, ექსტრემალურ ზომებს მიმართავდნენ ამ უმძიმესი კრიზისიდან თავის დასაღწევად. ორივე გუნდი, განსაკუთრებით კი „დინამო“, ისე თამაშობს, თითქოს შემამფოთებელი არაფერი მომხდარიყოს.

მთელი ჩვენი რესპუბლიკის სპორტული საზოგადოებრიობა აღმფოთებულია ჩვენი ფეხბურთელების ყოვლად უნიათო, უსუსური თამაშით. წინ კი კიდევ უფრო ძნელი, კიდევ უფრო რთული მატჩები გველის.

სწორედ ჩვენს სპორტულ საზოგადოებრიობას სრული უფლება აქვს მოითხოვოს და მოითხოვს კიდევ თბილისის „დინამოსა“ და ლანჩხუთის „გურიის“ ფეხბურთელთაგან სულ სხვა შემართებას, სულ სხვა თავგანწირვას და პატრიოტულ სულისკვეთებას.

თუ ვინმეს ჰგონია, რომ თბილისის „დინამოს“ მაისური ფეხბურთელს რაღაც განსაკუთრებულ პრივილეგიებს აძლევს, ძალიან ცდება. ამ უაღრესად რთულ ვითარებაში სულ სხვა მონდომებით, სულ სხვა ენერჯით უნდა თამაში და ვისაც ამის გაკეთება არ სურს, ან არ შეუძლია, ადგილი უნდა დაუთმოს სხვას, რომელიც მინდორზე ამდენს მაინც შეძლებს, მეორე და მესამე „მშრალი“ ბურთი არ მიიღოს თავის

კარში, როგორც ეს ალმა-ათაში მოხდა, ან წინა ხაზზე ისე არ დაძაბუნდება, ამ გაჭირვების უამს თუნდაც მცირედი რამ არ შესძინოს თვის კოლექტივს.

შექმნილი მდგომარეობა, ქართული ფეხბურთის გულშემატკივართა უამრავი წერილი, მათი სურვილები და მისწრაფებანი უფლებას გვაძლევს ვთქვათ: 0:3 „ქაირათთან“ ამჟამად შექმნილ ვითარებაში სამარცხვინოდ მიგვაჩნია თბილისის „დინამოს“ კოლექტივის თითოეული წევრისთვის, სირცხვილს კი ბრალეულნი მხოლოდ თავგანწირვით თუ ჩამოირეცხავენ.

„ქაირათი“ (ალმა-ათა) – „დინამო“ (თბილისი) 3:0 (1:0)

ალმა-ათა. ცენტრალური სტადიონი. 29 ივლისი.

„ქაირათი“: ბურაკოვი, გრიჯანი, ტიმოფევი, იაროვენკო, ვოლგინი (კარაჩუნი, 58), ვლასენკო (ნიკიტენკო, 65), ოგაი, ლედოვსკიხი, სალიმოვი, მასუდოვი, ფეხლევანიდი.

„დინამო“: გაბელია, კეტაშვილი (ყვანია, 30), ჩივაძე, ჭელია, ცვეიბა, გოგრიჯიანი (მიქაშავიძე, 72), სვანაძე, სულაქველიძე, კაკილაშვილი, ქეცბაია, შენგელია.

მსაჯი ი. ტიმოშჩენკო (დონის როსტოვი)

დუბლიორები - 0:2. გოლები გაიტანეს ყვანიამ და მიქაშავიძემ.

მასპინძლებმა საკმაოდ ადრე და საკმაოდ იოლადაც მიაღწიეს წარმატებას: იაროვენკო სწრაფად გავიდა დინამოელთ მცველებს შორის, რომლებმაც ვერ შეძლეს მისი გარღვევის ნეიტრალიზება, ბურთი გადასცა ფეხლევანიდს და გაბელიას კარში პირველი გოლი აღმოჩნდა.

ტაიმის დასასრულამდე თბილისელები მხოლოდ კონტრშეტევებით მოქმედებდნენ, მაგრამ ზედმეტად ინდივიდუალურად, გადაცემებიც კი უკიდურესად უზუსტო ჰქონდათ, ამიტომაც „ქაირათის“ კართან მათ თითქმის არც ერთი სახიფათო მომენტი არ შეუქნიათ.

შესვენების შემდეგ „დინამო“ გაცილებით უფრო აქტიურად და მობილიზებულად თამაშობდა. დაახლოებით 15-20 წუთის განმავლობაში „ქაირათის“ კარი რამდენიმე აშკარად სახიფათო მომენტის წინაშე აღმოჩნდა. თავდასხმის ყველაზე შედეგიან მოთამაშეს შენგელიას შეეძლო საპასუხო ბურთის გატანა, მაგრამ თავი გამოიჩინა მეკარე ბურაკოვმა. ერთ მომენტში კი ტიმოფეევმა ცარიელი კარიდანაც გამოიტანა ბურთი. შემდეგ შენგელიამ შეძლო ბურთის გატანა, მაგრამ გვერდითმა მსაჯმა „თამაშვარე მდგომარეობა“ მიიჩნია, რასაც წამსვე დაეთანხმა არბიტრი და ამის შემდეგ, ნაცვლად იმისა, რომ ახალი ძალებით, ახალი ენერგიით შეეცაოთ, დინამოელებმა ბრძოლის ველი მთლიანად მასპინძლებს დაუთმეს. რა თქმა უნდა, ალმა-ათელებმა კარგად გამოიყენეს მეტოქის ეს უნებისყოფობა და მასუდოვმა და კარაჩუნმა კიდევ ორი ბურთი გაიტანეს „დინამოს“ კარში.

თბილისის „დინამო“ მიმდინარე ჩემპიონატში მეცხრე ღამარცხეზა განიცადა!

ლელო 1.08.1987